

儀禮集釋

四



儀禮集釋

(四)

李如圭撰

儀禮集釋卷十一

聘禮第八

鄭目錄云。大問曰聘。諸侯相于久無事。使卿相問之禮也。案。今注疏本脫也字。小聘使大夫。周禮曰。凡諸侯之邦交。歲相問也。殷相聘也。世相朝也。聘于五禮。屬賓禮。案。今注疏本脫聘字。大戴第十四。小戴第十五。別錄第八。

聘禮君與卿圖事

鄭注。圖。謀也。謀聘故。及可使者。謀事者必因朝。其位。君南面。卿西面。大夫北面。士東面。

釋曰。此朝位。路寢門外正朝之面位也。諸侯三朝。燕朝見燕禮。射朝見大射儀。正朝面位當與燕射同。遂命使者。

鄭注。遂。猶因也。既謀其人。因命之也。聘使卿。

使者再拜稽首辭。

鄭注。辭以不敏。

君不許乃退。

鄭注。退。反位也。受命者必進。

釋曰進違其位近君

既圖事戒上介亦如之

鄭注既已也戒猶命也已謀事乃命上介難于使者易于介

釋曰介副也上介使大夫

宰命司馬戒衆介衆介皆逆命不辭

鄭注宰上卿貳君事者也諸侯謂司徒爲大宰案今注疏本脫大字衆介者士也士屬司馬周禮司馬

之屬司士掌作士適四方使爲介逆猶受也

釋曰不辭者賤不敢辭天子有六卿諸侯兼官并六卿爲三司徒兼大宰司馬兼宗伯司空兼司寇春

秋傳季孫爲司徒叔孫爲司馬仲孫爲司空是其事

宰書幣

鄭注書聘所用幣多少也宰又掌制國之用

命宰夫官具

鄭注宰夫大宰之屬也案各本脫大字據釋文補正命之使衆官具幣及所宜齋

及期夕幣

鄭注及猶至也夕幣先行之日夕陳幣而視之重聘也

使者朝服。帥衆介夕。

鄭注。視其事也。古文帥皆作率。

管人布幕于寢門外。

鄭注。管猶館也。館人謂掌次舍帷幕者也。布幕以承幣。寢門外朝也。古文管作官。今文布作敷。

釋曰。布幕于地。陳幣于上。

官陳幣。皮北首西上。加其奉于左皮上。馬則北面奠幣于其前。

鄭注。奉所奉以致命。謂束帛及玄纁也。馬言則者。此享主用皮。或時用馬。馬入則在幕南。皮馬皆乘。古文奉爲卷。今文無則。

釋曰。官陳幣者。官具之官也。左皮西上者也。物四曰乘。賓覲用乘馬。禮玉用乘皮。知享亦用乘。使者北面衆介立于其左。東上。

鄭注。既受行同位也。位在幕南。

釋曰。在幕南。北面視幣也。未受命之時。卿大夫士面位各異。東上。統于君。

卿大夫在幕東。西面北上。

鄭注。大夫西面辟使者。

宰入告具于君。君朝服出門左。南鄉。

鄭注。入告。入路門而告。

釋曰。出門而左。君位在東也。

史讀書展幣。

鄭注。展。猶校錄也。史幕東西面讀書。賈人坐撫其幣。每者曰在。必西面者。欲君與使者俱見之也。宰執書。告備具于君。授使者。使者受書。授上介。

鄭注。史展幣畢。以書還授宰。宰既告備。以授使者。其受授皆北面。

釋曰。下文宰授使者圭。授受同面。

公揖入。

鄭注。揖。禮羣臣。

官載其幣。舍于朝。

鄭注。待旦行也。

釋曰。官。從行之官。入竟展幣之有司是也。

上介視載者。

鄭注。監其安處之。畢乃出。

所受書以行。

鄭注。爲當復展。

厥明。賓朝服釋幣于禴。

鄭注。告爲君使也。賓。使者。謂之賓。尊之也。天子諸侯將出。告羣。廣。大夫告禴而已。凡釋幣。設洗盥如祭。有司筵几于室中。祝先入。主人從入。主人在右再拜。祝告。又再拜。

鄭注。更云主人者。席中之稱也。祝告。告以主人將行也。

釋幣。制玄纁束。奠于几下。出。

鄭注。祝釋之也。凡物十曰束。玄纁之率。玄居三。纁居二。朝貢禮云。純四只。制丈八尺。

主人立于戶東。祝立于牖西。

鄭注。少頃之間。示有俟于神。

又入。取幣降。卷幣。實于筭。埋于西階東。

鄭注。又入者。祝也。埋幣必盛以器。若藏之然。

釋曰。筭。竹器。

又釋幣于行。

鄭注。告將行也。行者之先。其古人之名未聞。天子諸侯有常祀。在冬。大夫三祀。曰門。曰行。曰厲。喪禮有毀宗。躡行。出于大門。則行神之位在廣門外西方。不言埋幣。可知也。今時民春秋祭祀。有行神。古之遺。

禮乎。

遂受命。

鄭注。賓須介來乃受命也。言遂者。明自是出不復入。

上介釋幣亦如之。

鄭注。如其于禰與行。

上介及衆介俟于使者之門外。

鄭注。俟待也。待于門外。東面北上。

使者載旛。帥以受命于朝。

鄭注。旛。旌旗屬也。載之者。所以表識其事也。周禮曰。通帛爲旛。又曰。孤卿建旛。至于朝門。使者北面東

上。古文旛皆爲旛。

釋曰。旛通以絳帛爲之。無他色之飾。所謂周之大赤也。北面東上。展幣之位。

君朝服南鄉。卿大夫西面北上。君使卿進使者。

鄭注。進之者。使者謙不敢必君之終使已。

使者入。及衆介隨入。北面東上。君揖使者進之。上介立于其左。接聞命。

鄭注。進之者。有命宜相近也。接猶續也。

釋曰：近、附近之近。後猶近，近君相近，同。

賈人西面坐，啓櫝取圭，垂纁不起而授宰。

鄭注：賈人在官知物賈者，纁所以藉圭也。其或拜，則奠于其上。今文纁作纁。

釋曰：櫝，函也。論語曰：龜玉毀于櫝中。纁者，以韋衣木，畫以雜采，以之薦玉。廣袤各如其玉之大小。又以五綵組繫焉。有事，則組或垂或屈之。垂者，垂之向下；屈者，屈之于手。凡言屈垂者，皆據組而言。

宰執圭，屈纁，自公左授使者。

鄭注：屈纁者，斂之。禮以相變爲敬也。自公左，贊幣之義。

使者受圭，同面垂纁以受命。

鄭注：同面者，宰就使者北面竝授之。旣授之，而君出命矣。凡授受者，授由其右，受由其左。

旣述命，同面授上介。

鄭注：述命者，循君之言，重失誤。

上介受圭，屈纁，出授賈人。衆介不從。

鄭注：賈人將行者，在門外北面。

釋曰：如使者門外之位也。出玉命賈人之留者。

受享束帛加璧，受夫人之聘璋，享玄纁束帛加琮，皆如初。

鄭注。享。獻也。既聘又獻。所以厚恩惠也。帛。今之璧色繒也。夫人亦有聘享者。以其與己同體。爲國小君也。其聘用璋。取其半圭也。君享用璧。夫人用琮。天地妃合之象也。圭璋特達。瑞也。璧琮有加。往德也。周禮曰。圭璋璧琮以類聘。

釋曰。琮。半璧也。前夕幣時。束帛玄纁已陳矣。至此乃受所加之璧琮者。以其與圭璋同類。尊之也。圭璋不用束帛。特達也。璧琮則加束帛乃達。君子于玉比德。故聘享以玉致之。所謂往德也。周禮幣放其器之色。此束帛當如其璧之色。未知璧用何色耳。凡聘享之圭璋璧琮。皆降于君所執。朝享者一等其文。瑑之而已。

遂行。舍于郊。

鄭注。于此脫舍衣服。乃卽道也。曲禮曰。凡爲君使。已受命。君言不宿于家。斂。斂。

鄭注。此行道耳。未有事也。斂。藏也。

若過邦。至于竟。使次介假道。束帛將命于朝。曰。請帥奠幣。

鄭注。至竟而假道。諸侯以國爲家。不敢直徑也。將。猶奉也。帥。猶道也。請道。已道路所當由。

釋曰。春秋傳。楚子使申舟聘于齊。曰。無假道于宋。宋殺申舟。

下大夫取以入告。出許。遂受幣。

鄭注言遂者明受其幣非爲許故也容其辭讓不得命也
釋曰言遂者容其中有辭讓之節非爲許之而受其幣

餼之以其禮上賓大牢積惟芻禾介皆有餼

鄭注凡賜人以牲生曰餼餼猶稟也給也以其禮者尊卑有常差也常差者上賓上介牲用大牢羣介用少牢米皆百筥牲陳于門內之西北面米設于中庭上賓上介致之以束帛羣介則牽羊焉上賓有禾十車芻二十車禾以秣馬

釋曰鄭所云者雜約主國致饗餼上賓上介羣介米皆百筥上賓上介牲陳于門內之西北面米設于中庭用束帛致之大夫餼賓羣介則牽羊以致之凡禾牢十車此餼一牢故禾十車芻倍禾故芻二十車也言積惟芻禾則無車米與薪且獨上賓有之耳

士帥沒其竟

鄭注沒盡

誓于其竟賓南面上介西面衆介北面東上史讀書司馬執筴立于其後

鄭注此使次介假道止而誓也賓南面專威信也史于衆介之前北面讀書以勅告士衆爲其犯禮暴掠也禮君行師從卿行旅從司馬主軍法者執筴示罰

未入竟一肄案一今注疏本作壹

鄭注。謂于所聘之國。竟也。肆。習也。習聘之威儀。重失誤。

爲墼壇畫階。帷其北。無宮。

鄭注。墼。土象壇也。帷其北。宜有所鄉依也。無宮。不墼土。畫外垣也。

朝服無主。無執也。

鄭注。不立主人。主人尊也。不執玉。不敢褻也。徒習其威儀而已。

介皆與北面西上。

鄭注。入門左之位也。古文與作豫。

釋曰。賓行聘時。介止于門左。北面西上。然則所習者。習席門內之禮。

習享。士執庭實。

鄭注。士。士介也。庭實。必執之者。皮則有攝張之節。

習夫人之聘享。亦如之。習公事。不習私事。

鄭注。公事。致命者也。

釋曰。聘享。夫人之聘享。問卿。公事也。私覲。私面。私事也。

及竟。張旛。誓。

鄭注。及。至也。張旛。明事在此國也。張旛。謂使人維之。

釋曰。維持其旒也。

乃謁關人。

鄭注。謁。告也。古者竟上爲關。以幾異服。識異言。

釋曰。國語曰。周之秩官有之。敵國賓至。關尹以告。行理以節逆之。

關人問從者幾人。

鄭注。欲知聘問。且爲有司當共委積之具。

以介對。

鄭注。以所與受命者對。謙也。聘禮。上公之使者七介。侯伯之使者五介。子男之使者三介。以其代君交于列國。是以貴之。周禮曰。凡諸侯之卿。其禮各下其君二等。

釋曰。大行人職。上公介九人。侯伯七人。子男五人。

君使士請事。遂以入竟。

鄭注。請。猶問也。問所爲來之故也。遂以入。因道之。

釋曰。春秋傳。晉韓宣子聘于周。王使請事。對曰。晉士起將歸時事于宰旅。無他事矣。此其對辭。

入竟。斂廬。乃展。

鄭注。復校錄幣。重其事。斂廬。變于始入。

布幕賓朝服立于幕東。西面。介皆北面。東上。賈人北面坐。拭圭。

鄭注。拭。清也。側幕而坐。乃開櫝。

釋曰。賓誓則南面。專衆也。展幣則西面。將命也。

遂執展之。

鄭注。持之而立。告在。

上介北面視之。退復位。

鄭注。言退復位。則視圭進遠位。

退圭。

鄭注。圭璋尊。不陳之。

陳皮北首。西上。又拭璧展之。會諸其幣。加于左皮上。上介視之。退。

鄭注。會。合也。諸。於也。古文曰。陳幣北首。

釋曰。幣。束帛也。享用束帛加璧。故今亦合而陳之。小行人職。合六幣。璧以帛。琮以錦。

馬則幕南北面。奠幣于其前。

鄭注。前。當前幕上。

展夫人之聘享。亦如之。賈人告于上介。上介告于賓。

鄭注展夫人聘享上介不視貶于君也賈人既拭璋琮南面告于上介上介于是乃東面以告賓亦所謂放而文之類。

有司展羣幣以告。

鄭注羣幣私覲及大夫者有司載幣者自展自告。

及郊又展如初。

鄭注郊遠郊也周制天子畿內千里遠郊百里以此差之遠郊上公五十里侯伯三十里子男十里案此下今注疏本有也字近郊各半之。

釋曰各以其國封疆十之一差去國之數爲遠郊也周禮諸公封疆方五百里諸侯方四百里伯三百里子二百里男百里周東郊成周去王城五十里則天子近郊也。

及館展幣于賈人之館如初。

鄭注館舍也遠郊之內有候館可以小休止沐浴展幣不于賓館者爲主國之人有勞問己者就焉便疾也。

賓至于近郊張旌君使下大夫請行反君使卿朝服用束帛勞。

鄭注請行問所之也雖知之謙不必也士請事大夫請行卿勞彌尊賓也其服皆朝服上介出請入告賓禮辭迎于舍門之外再拜。

鄭注。出請出門西面。請所以來事也。入告。入北面告賓也。每所及至。皆有舍。其有來者與。案原本脫與字。據今注疏本補。釋文云。行與音餘。可證當有與字。皆出請入告于此言之者。賓彌尊。事彌錄。

釋曰。春秋傳。魯叔弓聘于晉。晉侯使郊勞。辭曰。寡君使弓來繼舊好。固曰女無敢爲賓。敢辱郊。使致館辭曰。敢辱大館。

勞者不荅拜。

鄭注。凡爲人使。不當其禮。

賓揖先入。受于舍門內。

鄭注。不受于堂。此主于侯伯之臣也。公之臣。受勞于堂。

釋曰。按司儀職云。諸公之臣相爲國客。大夫郊勞。旅擯三辭。拜辱。三讓。登聽命。下拜。登受。僎使者。如初之儀。及退。拜送。言登聽命。則公之臣受勞于堂也。侯伯之使者五介。此禮有上介及士介四人。知主于侯伯之臣。

勞者奉幣入。東面致命。

鄭注。東面。鄉賓。

賓北面聽命。還少退。再拜稽首受幣。勞者出。

釋曰。勞者授幣當南面。賓北面訝受之。凡卑者訝受。敵者竝受。

授老幣。

鄭注。老。賓之臣。

出迎勞者。

鄭注。欲償之也。案。今注疏本脫也字。

釋曰。償。以禮報賓也。

勞者禮辭。賓揖先入。勞者從之。乘皮設。

鄭注。設于門內也。物四曰乘皮。麋鹿皮也。

賓用束錦擯勞者。

鄭注。言擯者。賓在公館如家之義。亦以來者爲賓。

勞者再拜稽首受。

鄭注。稽首。尊國賓也。

釋曰。稽首。拜之重者。

賓再拜稽首送幣。

鄭注。受送拜皆北面象階上。